

CESETE

Cesete picenine e senza ori
sconte nei vicoleti de çità
casete del Signor dove i signori
no g'hà mai fato 'n pò de carità

Drento ghe 'n altarin de piera scura
'na fila de bancheti carolà
epur te -ssénti el cor che te sussura
çerte orassioni ormai desmentegà

te vien voja de dir, se ghè 'n Signor,
che sta in le Cese come monumenti,
dove i turisti no i se scalda el cor,
ma i varda solo i quadri e i ornamenti,

quà drento Cristo vegnarà a sponzar,
scoltando nel silensio du veceti
che prega pian -pianin par no turbar
gnanca col fià el slusin dei mocoleti

du pori Cristi sola compagnia
de 'n antro Cristo solo tacà via.

ARENA DE AVESA

Posto desmentegà dal tempo,
ne la to conca
ieri, ancò, doman?
vol dir sempre!
Scalinade verdi
dove i secoli
a mile se immucia;
quà el ricordo de l'omo
el torna indrio,
çercando rami antichi.
Da quei rami persi,
quatro man, de 'n ombra
innebiada dal tempo,
s'hà calà la prima volta
in tèra, e stando drita...
s'hà confrontà con Dio...

ABANDONO

Casete sparpajade in mezo ai prà,
tegnude sù de tonega e de sassi,
paese dove el tempo el s'hà fermà
stufo de nar, par riposar i brassi.

Quante finestre orbe, dorme strache,
sognando i so gerani sul bancal,
canti de done, rumegar de vache,
zughi de fioi, e veci sul meal.

Adesso solo el vento quà sé move,
sfiorando i muri, carghi de ricordi,
el sopia intorno al posso, el sé comove,
e pò el caressa quasi con amor,
sto paeseto, vivo nel me cor.